

Maneno Mema na ya Adabu

Bwana MUNGU amenipa ulimi wa hao wafundishwao, nipate kujua jinsi ya kumtegemeza kwa maneno yeye aliyechoka, hunyamsha asubuhi baada ya asubuhi; hunyamsha, sikio langu lipate kusikia kama watu wafundishwao—**Isaya 50:4.**

Kile ambacho Yesu alikuwa katika maisha Yake hapa duniani, ndicho ambacho Mkristo anapaswa kuwa. Yeye ni kielelezo chetu, si tu katika usafi Wake usio na doa, bali katika uvumilivu, wema Wake na mvuto wa tabia. Alikuwa imara kama mwamba pale ukweli na wajibu ulipohusika, bali Alikuwa mwema na mwadilifu daima. Maisha yake yalikuwa kielelezo tosha cha uungwana wa kweli.... Uwepo Wake ulileta mandhari safi nyumbani na maisha Yake yalikuwa chachu itendayo kazi katikati ya vipengele vya jamii. Akiwa mpole na safi, Alitembea kati ya wasiojali, wafidhuli, wasio na adabu; katikati ya watoza ushuru wasio na haki, Wasamaria wasio waadilifu, askari wa kipagani, wakulima wakali, na umati wa watu waliochanganyika.

Aliongea maneno ya huruma hapa na neno pale alipowaona watu wamechoka na kushurutishwa kubeba mizigo mizito. Alishiriki mizigo yao na kuwaelezea masomo Aliyojifunza toka kwenye asili, upendo, wema na hisani za Mungu. Alitafuta kuwatia moyo kwa matumaini walio wabaya zaidi na wasio na matumaini, akiweka mbele yao uhakikisho kwamba wangeweza kuwa watu wasio na lawama na wasio na madhara, wakifikia tabia ambayo ingewadhihirisha kuwa watoto wa Mungu.... Yesu aliketi akiwa mgeni wa heshima kwenye meza ya watoza ushuru, kwa huruma na wema Wake wa kijamii akionesha kwamba alitambua hadhi ya binadamu; na watu walitamani kustahili imani Yake. Maneno ya Yesu yenye baraka na yenye kuleta uzima yalishuka kwa nguvu juu ya nafsi zao zenye kiu. Hamasa mpya ziliamshwa na uwezekano wa maisha mapya ulifunguliwa kwa watu hawa waliotengwa na jamii.

Dini ya Yesu hulainisha chochote kilicho kigumu na chenye mihemko katika tabia na kulainisha chochote kilicho na miparuzo na chenye ulaghai katika mwenendo. Ni dini hii ambayo huyafanya maneno kuwa ya upole na mwenendo wa kuvutia. Hebu na tujifunze kutoka kwa Yesu jinsi ya kuunganisha hali ya juu ya usafi na uadilifu na tabia ya uchangamfu. Mkristo mwema na mwenye staha ni hoja ya nguvu zaidi ambayo inaweza kutolewa kwa manufaa ya injili.